

光緒重修天津府志

重修天津府志卷四十五

傳七

人物五

國朝

目錄
張永清

南皮縣

白德崇

張晟

張菁

湯鉉

子清

吳維哲

劉深

湯裔振

柴克振

子堪棟

柴廷望

尹烈

王一良

黃鉅

單秉心

張美蘊

許齡

張受長

張惟寅

張慶長

劉人龍

張發長

張大復

張開雲

張丙震

兄奎震
甲震

葉治

張芝馨

張端城

姪志廉

單承宗

張璠

張廷緒

高星

高鵬搏

何承魁

高步雲

張恪

張芝郁

張鎡

潘一桂

尹模

張津源

張全懋

劉有慶

潘震乙

劉有銘

張佩訓

張如椒

孫成貴

子彤賓

張鐸

張鑒

宮文燥

侯澤岳

辛延壽

白汝霖

侯維岳

王遇極

鹽山縣

王文楨

劉澤霖

胡豫

霍槿

左巢

劉振基

王璫

劉澍

劉靜年

邵汝德

趙景伯

韓峰起

邵沖

王化明

劉芳範

趙爾孫

霍恪

趙烟

孫嵩

張潤

劉運祺

張世英

韓秉仁

趙鑑

趙溫

趙元福

李士晉

劉更新

趙東秀 弟東魁 劉為庚 趙思等 賈瑋 張衡祝

盧克勤 子堦 李廷輔 孫詠 劉稼書

王居易 張本質 劉适

張詮 賈魁元 任大德

劉曾璇 姜興武 尹元龍

趙越 李鈞 孫述庭

孫敏浦 韓以仁 劉慶元

張酌 陳六 王慶元

劉曾璈 弟曾珂 賈待 賈登第 賈超昇 張世

立業 姜文遠 劉之岳 趙培之

于尙志

王九良

劉清潭

楊濬源

張經

劉鍾琦
李照林

趙俊民
孫嘉猷

張雲廬

兄雲蒸
高玉峰

韓逢瑞

王敬業

楊廷選

楊玉麟

韓以德

劉恪侯

任天相
沈修

敬
傳光美

王澤溥

張仲裔

劉啞子

李香蓉

李應瑜

姜名山

王音槐

潘道南

遲伯壘

張清輝

張文沛

張廷士

劉登高

邵健

褚爽

傅葛天

張康甯

王華峰

李裕霽
賈桂芬

張印潭

李尙賢

慶雲縣

張三成

胡璜

崔養重

胡珪

陳喜

子士雅

崔允貞

劉元宰

崔槿

劉夢楫

子泰

胡清

丁重新

陳森

賈生才

馮經世

陳枏

劉敏

陳廷桂

胡淳

張鶴

鄧麟

胡時雍

馬煌

劉鈞

王發祥

劉允桂

劉煦

劉廣恕

劉揮

劉管城

崔旭弟陽

晨
李楨榦

劉坦

徐圭璋

崔光笏弟光箕

解鳳岡

馬裕霖

蔣臨照子拱辰

王夢瑞

胡德羣

張岐

南皮縣

蔡啟盛案此舊志未見新志亦傷寬泛未覈知
將前拔貢悉改酉年不備崇祀姓名尤顯失也

張永清字虛白庠生善治生而慷慨寒畯多依之

流寇北擾遂避居金陵後返里益廣施舍崇禎庚

辰道殣相望煮粥賑濟全活無算

縣志案此事蹟皆明季因其

祀義行位在鼎革初故冠於卷首

白德崇字伯修庠生父養鈐優行食餼崇禎戊寅
北行羈蒙古二十載德崇日夜思慕順治戊戌聞
父入都步行五百里牽衣號泣同邑張顯吾張肇
祉貸八十金贖歸完聚終身

前志

張晟字曦之庠生明季父攜家避難金陵母不欲
南因留侍養未幾難作奉母村居匿窟室中聞江
左大亂日夜南嚮號泣祈父生還旣而果歸庚辰
大祲勸父煮粥賑飢嘗步郭外見有老幼欲覓食
他郡者留栖別墅好施多類此

縣志

張莆監生父性慷慨家計中落莆竭力承父志繼

母宋邁疾思食林禽時亘寒不可得甫號泣求之
適同邑王氏林禽一樹方冬結實甫得以進母遂
瘞人以爲孝行所感母姨孀居撫一子貧不能自
存割地三十畝贍之

前志 案
祀孝義

湯鉉字鼎輔賓之孫性魯子也父號吉水翁早死
因號念水鉉少善文兼工書法習掌故以

順治
乙酉明

經授章邱知縣杜干請平冤獄鋤豪強作興學校
清理田糧爲監司所賞嘗曰似湯令眞不愧循吏
秩滿陞山西大同郡丞修城堡裕兵餉勘災傷賑
饑民一時夙弊肅清總督廉其治行委攝殺虎堡

稅商民便之薦剡方上以前任註誤左遷縉雲丞

攝遂昌縣事勒石革弊政六款改授程鄉知縣不

就家居十六年未嘗一及公門

案祀鄉賢

子湑字潤生

順治

戊子舉人

辛丑進士家居不仕僑居武林受業者

衆甄拔皆至通顯遊括蒼與學使徐郡守項郡丞

姚邑令王副憲唐侍御方論文賦詩爲忘形交號

括蒼七友康熙五十五年祀鄉賢

同上

吳維哲字濬之號茹菴幼穎異過目不忘試輒冠

軍順治辛卯舉於鄉辛丑登明通榜家貧親老選

禮縣適軍務倥偬詳陳差役利弊臬司伊公稱爲

仁人之言丁父憂服闋補汝陽縣請蠲賑卹飢民
集流亡墾荒土全活甚衆著勸民俗語爲衆講解
以勤廉著稱未幾罷歸勤學至老不倦工書法尤
長於詩著有嘯譜浙江吟隴西吟天中彙集行世

康熙癸丑編輯邑志八卷

縣志

劉深字海若順治甲午乙未聯捷進士授河南扶
溝縣治尙寬平丁酉入闈校士得合淝李相國天
馥旋行取行人考選湖廣道監察御史左遷陝西
布政司都事丁憂歸

湯裔振字其武少孤性孝與母穆氏艱苦備嘗順

治甲午己亥成進士授南充知縣招徠撫字不遺

舉人

餘力厯任六載丁憂歸服闋補信宜縣多惠政擢平涼同知釐奸剔弊軍民安堵以疾告歸著有春

秋潛注左傳輯要等書行世

俱同上
案祀鄉賢

柴克振字迴瀾以貢生官平鄉訓導與諸生講求實學發傳注所未明轉懷柔教諭代署縣事籌濟貧士俾無失業廟學修治一新擢諸城縣除火耗疏驛遞民有德政謠甫數月因海寇之變詿誤左遷吉安府經歷以才猷見知於按院卒年八十四貧無餘資著有書經酌旨文章扼要藏於家

前子志

堪棟字柱礎順治十八年舉人孝友好義康熙三

十八年父子同祀鄉賢

舊志

柴廷望字駿度堪棟子八歲手書六經既長五官
並用十一歲爲諸生康熙癸卯舉人癸丑進士母
氏王性嚴毅廷望壹意承歡不樂仕進既十年始
起授湖廣新甯知縣未閱歲囹圄一空善決疑獄
楚人謠曰寬猛得宜柴南皮治獄合經柴新甯行
取文選司主事歷員外郎中出督貴州學政卒著
有尙書解傳若干卷初邑修志乘艱於費破產任
之既卒於官不能歸葬某帥出門下爲營兆殯云

後祀鄉賢

縣志

尹烈字允揚少讀書祖老父病日不遑夜讀弗輟
康熙甲子舉人丁丑進士仕河南輝縣知縣勸農
桑修學校廉潔化俗有田某舊抱奇冤已定讞力
爲辨釋訪獲巨猾卽除之一邑稱快嘗暮經新鄉
民蟻聚燈送詢之曰新民願借久矣撫軍趙宏燮
惑奴言欲兩司會參俱不可曰輝令若參全屬無
一可留者後遂告歸不出

王一良字純善六歲喪父哀慕終身躬耕事母五
十餘載色養備至母秋病危思冰焚香夜禱果得

冰進母病乃瘳母好施承志惠濟康熙癸未河決
遠近多賴以存活助婚葬置義田善行甚夥後舉
鄉飲介賓年八十八歲卒

案祀
孝弟

黃鉅字大任康熙戊子舉於鄉癸巳成進士雍正
元年授陝西安定縣邑素號衝繁商民苦派累革
陋規三千餘金設義學課諸生暇則習射士風彬
彬奉檄出玉門關建沙州城又檄赴肅州甘涼理
糧餉迎送駐防奔馳無甯晷本任亦無廢事邑人
士頌之臨終陞雲南尋甸州牧

單秉心字正吾家富好善樂施康熙四十九年河

決出粟贍濟遠近感頌壽至九十三歲俱同上

張美蘊字充實淮元孫庠生少孤性孝友從姪鏞四歲失怙撫若己子於民竈徭役謀力均之邑人

尤頌德焉

前志

許齡字南金號比菴雍正癸卯舉人連試禮部不第乃家居教授慨然以振名教維風化爲念河間紀文達公同邑張兼山都轉其及門最著者也後

祀鄉賢

縣志案鄉賢祠無此殆漏也

張受長號兼山幼穎異奮志積學雍正丙午聯捷進士知河南林縣事有異政民爲建生祠調商邱

再調祥符陞陳州府知府甫三月調開封尋陞河北道丁父憂回籍服闋補江西驛鹽道調督糧道以病不復出當分守河北防秋汛值暴風舟幾覆凝坐不動家居三十餘年不問外事受長爲明安軒副使裔孫狀貌科名官階年壽無不脗合人咸奇之

張惟寅字子畏號學山雍正乙酉登賢書乾隆丙辰成進士由戶部主事遷吏部員外郎晉考功郎中掌文選司御史掌貴州道劾閩督裁冗員皆得請授雲南道改驛鹽道立法剔弊清出豆鹽餘銀

七千兩歸公以前官累左遷知府署鶴慶永北補
臨安調首郡數值地震活災氓數萬口遷督糧道
調浙江驛鹽道尋補福建汀漳龍道閩俗獷悍痛
創之漸息雪上杭冤獄人頌神明卓薦入都方嚮
用回任數月以治獄卒於省

張慶長字穀貽雍正乙卯舉人乾隆辛未進士任
廣東山左海豐等縣斷獄如神邑皆大治親老告
歸敦實行崇經術成就人材無算卒年四十六子
端城孫志廉曾孫修育春育元孫曾敷世以進士
出身

劉人龍字孟班工古文乾隆庚辰舉於鄉授四川
納溪知縣著有戢軒文集

張發長字培厚幼師伯兄慶長乾隆乙酉舉人授
江西瑞昌知縣因公被議歸著有禹貢撮要儀禮

傳注

俱同上

張大復原名景運字靜旃博學能文尤長於詩乾

隆丁酉拔貢生授浙江太平知縣改遷安教諭性

好遊足迹徧天下大江南北詩人如洪亮吉張問

陶皆與交

張重撰傳

著有因樹山房詩鈔二卷令支遊

覽集一卷晉遊草一卷

畿輔詩傳

張開雲字晴湖乾隆癸卯舉人知湖北安陸當陽等縣多善政入安陸名宦祠

縣志

張丙震字鑑菴號岸樵與兄奎震甲震夙稱安平三張庠生乾隆丁酉賢書庚子成進士由主事遷員外郎爲阿文成公所器而非公事未嘗至出守寶慶連丁內艱值苗亂奪情留辦軍需在保靖圍城中竭力捍禦旋由保靖赴乾州逆苗千餘將途遇屹不動會官軍來迎苗驚竄在嚴州六年多善政嘉慶十一年卒於官嚴人奉粟主於文昌閣春秋祀事與郡之三賢祠並舉焉次子曰誠孝友著

聞同
上

葉治字復齋號敬亭本滄州葉氏寄籍南皮乾隆
庚子舉人聯捷進士授湖北石首知縣捕黃水套
賊楊德龍周士虎等十二人江水將潰隄親與民
力護得免調鍾祥擒戮大盜劉潮等十二人修築
荊州萬城隄帑不敷捐己橐成之又出金二千修
郡東唐岡大磯自此襄水至郢無潰決患擢荊門
知州以失黔鞘落職賊旣獲補鄖縣值荆宜賊起
保康竹山失守房縣復被圍知府馳救以城屬治
治募鄉勇飭守備聞市有賣竹帚者數十人治曰

是可疑迹至江干數十舟盡竹帚治曰賊將用火
攻耳急擒之焚其舟竹帚下皆刀矛獲僞千總孫
得勝嗣獲謀王旅昌徐良等三十六人又獲僞總
督佐德星內應以絕俄賊復由陝侵鄖治守火車
嶺賊至大破之張漢潮由房襲鄖見守堅聲言借
河赴陝治揮衆以礮擊死騎賊三名始遁鄖爲楚
陝出入要道賊犯郡城四年卒無恙陝甘總督宜
春歎曰鄖郡之不失治一人力也擢河陽知州河
當江漢之衝隄工最重抵任悉爲修補一日舟次
漢川家人以黃魚獻治曰黃魚出荆江非襄水物

必荆水過漢水逆流湖南各隄不保矣夜馳往至

則水將溢力護得無虞卒於楚民尸視之

滄州詩鈔

張芝馨仕台灣竹塹巡檢乾隆五十二年正月林

爽文據嘉義

縣志

芝馨守港力戰死事聞

卹如例

忠義列傳

張端城字研谿號梅坪乾隆癸卯甲辰聯捷進士

官主事洊升郎中授甯武知府多所興除升陝西

督糧道值軍興辦理合宜授雲南按察使親老請

改京職授順天府丞不避本籍特邀異數甲子請

終養歸先是弟瑞城早世孤志廉甫七歲教育成

人號秋艇由拔貢甲子乙丑聯捷館選改主事戊寅典黔試升員外郎癸未分校春闈甲申擢御史請將孫奇逢從祀西廡庚寅出守大理因議封鹽井爲民力爭忤當道改簡缺未赴除禮部員外郎

卒

縣志

單承宗字子丕武生性孝友篤於本源出資刊族譜乾隆己丑砥橋賴以成子龍閣太學生克承父志又倡建東橋值歲荒煮粥食餓施棺施藥

張璠字負遠事繼母三十餘年無閒言弟璉得風疾言動失常曲意調護之俾自適倡建宗祠廣贈

族戚捐金數百建宣惠河橋於笙劉莊前

張延緒字雪耳號安齋文炳子授國子典簿不赴
營城南野雲亭偕進士李之嶧築室五十餘間集
同志肄業延左方鸞爲師之嶧副之自雍正丙午
至乾隆丙辰登賢書者三十餘人工詩與書畫

高星字仲樞庠生好施與假貸扶助無德色泊鎮
通衢遇潦病涉捐金首倡築隄建橋又設義渡以
濟行人邑令居因累不得去傾囊資其歸居每語
人曰古道照人孰如高仲樞

高鵬搏字圖南貢生乾隆五十七年大饑典地買

糧以濟窮民因孫熊夢貴贈戶部主事

何承魁字園照乾隆五十七年大饑出藏粟數千石次年春粟將不給妻王盡出衣飾助之

高步雲字峻升庠生事繼母無異所生田產任弟自擇泊鎮居宅舊藏悉與之已徙居於鄉

俱同上

張恪字佩庚嘉慶十三年舉人道光初授館陶知縣有陶山實政圖士民頌之著有四書引古錄二卷四書辨同六卷叢樹山房詩四卷防躁軒文集四卷

采訪冊

張芝郁字質仲嘉慶癸酉舉人有豹隱山房稿

同上

張鎮字又甫乃會曾孫嘉慶癸酉舉人大挑貴州知縣洊至興義知府道光末粵匪構難身歷戎行

周知全黔要隘一時龍里貴平數十團服其恩信莫不聞風嚮應常以死士數百人破賊數萬及賊攻興義誓眾死守飛礮及身不少動遂安全境以功加道銜歷署貴西貴東道總督吳文節委以全省軍務年六十四以積勞終於軍子六最著者之

洞今官總督

縣志

潘一桂字薌林號江巖嘉慶己卯舉人工文翰卒年二十八著有花磚社賸稿詩採入

幾輔詩傳弟一桐廩生子昌祚咸豐壬子舉於鄉

尹模字式庭監生孝友讓產鄉黨咸稱盛德子宗
泗舉人宗瀄進士

張津源字問渠嘉慶己卯優貢道光辛巳舉人著
有寶素齋詩賦稿渤海詩幙雜著

張全懋字勵軒道光辛巳舉人有露筠窗吟稿俱同
上

劉有慶字馨圃號芸軒道光壬午九年進士授南

康知縣明敏有才幹年饑懲亂民集紳富設廠賑
濟善聽訟有父告子不養問數語各予百錢命姑

覓食還問子食錢若干子出所餘八十錢父則盡
矣乃怒曰汝子皆微藝安得日以百錢食汝汝不
業反責勤儉子乎父大慙泣請釋其子偕歸

南康縣志

調玉山復遇饑料量如故秋赴闈差墮鄱湖死兩

邑士民同爲建祠

玉山縣志

潘震乙字心潭別號渤海釣叟道光壬辰副貢生

嗜學授徒多所成就嘗主講葉縣書院慶雲書院

纂修鹽山縣志南皮縣志

縣志

劉有銘字絨三道光甲辰舉人丁未入翰林同治

庚午典試浙江丁卯癸酉兩典試江南仕至工部

侍郎左遷通政使卒當戊辰捻賊陷邑城鄉衆禦賊死者甚衆賴博諮入告

張佩訓字韋堂號實園咸豐辛亥舉人戊辰進士
歷任河南尉氏息縣葉洛陽知縣嫡母劉年老失明迎養署中備盡色養民間稱孝光緒十一年調任祥符卒

張如椒太學生濟少子幼失怙奉母殷氏曲盡孝道至老不衰

俱同上
案祀孝弟

孫成貴字天乙好施與屢救急難爲人所難能子彤賓字殿臣有父風至今咸稱之

采訪
冊

張鐸字振斯幼穎悟記誦過人因家有五老遂輟學奉養得歡心膽濟戚黨甚多

張盦事母盡孝躬耕以養爲弟完婚自不婚娶遭兵燹啖糠粃腸幾絕母之甘旨未嘗乏母病卧二十年躬侍無怠病亟禱天刲臂以進既卒號慟泣血葬母之次日卽以身殉光緒六年奉

旌表

官文燦字秀章庠生性篤孝其世父無子撫爲嗣未能得其歡心時受扑責鄉鄰憐而慰之答曰此事親之道未盡耳後卒克諧

侯澤岳號念廬貢生醇謹工詩著有念廬詩草子

金鴻庠生亦能詩

辛延壽字鶴千庠生著有竹君吟草

白汝霖字旣霑幼負才名旋棄舉子業潛心理學
教授鄉里書畫吟咏因愛菊自號晚香居士

俱同上

侯維岳字嵩高號息陰道人舊有東園別墅種菊
鼓琴嘗風靜簾垂忽座菊亂落訝之理絃再鼓曲

未終而錯落如前乃共異之

秋坪新語

鹽山縣

案此新志雖未泯微疵要已大醇詳明雅潔縹緲
絢世業之明證如考崇祀姓名尤足是正各志

王遇極字象風庠生慷慨有大志

國初土寇蠢動遇極破家出資聯絡鄉閭撫勦並用

地方賴以安堵鄉里義之

縣志

王文楨字柱石貢生任湖廣宜城知縣撫流徙興

學校剔奸革弊惠政甚多以憂歸三與賓筵

據前志補

案祀忠義縣

志作元年貢

劉澤霖字雨若號甘露

順治戊子

以拔貢任陝西漢中

府同知築修漢水長隄民賴其利號爲劉公隄時

吳逆爲平西王由漢移滇兵驕甚債折居民子女

人口號泣滿路澤霖懲其尤不法者復倡捐數千

金贖回賴以完聚者千餘家陞鳳翔府知府鳳寶
扶岐積欠十數萬金官民交病澤霖反覆痛切上
陳院司亦爲流涕竟得全豁入覲時便道歸里知
邑苦通草之累謀諸當事力請繳還部價代民償
四百七十餘金累以永絕著有蒞鳳簡言四卷祀

陝西名宦祠

知縣黃貞麟撰墓誌

孫嵩友于敦厚著聞一鄉

前志

胡豫字立我本姓韓父名鼎明季被兵脅北去從

胡姓由旗籍

順治戊子

拔貢授縣令陞江西饒州府知

府調直隸真定府歸鹽省親掃父墓卒於故里任

饒時愛民勤政人甚德之贈以五馬農桑圖

縣志

霍樵字閏生號寄菴明諸生旋棄去精研理學

左渠字玉素博學有氣節鼎革後棄諸生隱於醫

與邵雙彌霍閏生爲淡交時人謂之三處士

俱同上

劉振基字宜孫

辛卯舉人

任四川資縣知縣甘苦同民

多有善政陞任南城兵馬司正指揮使能以廉明

坐鎮臺使者交薦其賢事關梓里皆慨任之卒於

官

據前志補案祀忠義

王璫貢生孝親好義修學宮造橋梁善舉多端譽

望翕然著有賞心集祀鄉賢

前志引舊通志祀孝弟不在鄉賢

案

重修天津府志

卷四十五

人物

大光緒戊戌

劉澍字霖生歲貢順治閒部議學田租解部澍首
請於縣申准仍存縣賑濟貧士邑舊有李公祠臨
孔道設棚施茶歲久就圯澍倡義重修仍施茶門
人泐石以誌縣志

劉靜年字研圃號樗園廩貢生父廷對天津葉進
士際春爲之傳靜年應舉入都聞親病束裝適歸
遂絕意進取治家教子子九人曾璇曾璈最著著
有芳艸草堂詩存同上

邵汝德字雙彌號蔗泉幼擅雋才奇氣歷游齊魯
諸名勝登泰山謁闕里歸遭母喪嘔血斗餘甲申

鼎革後有司首舉優行力辭之官符趨入闈亦不

就六十三歲卒自著墓誌子冲

前志

趙景伯號五臣父光耀明廩生著家訓要言八則

景伯順治丁酉登賢書宰湖北蒲圻縣時夏包子

以叛卒攻陷武昌勢甚熾行偽牌到蒲圻立碎之

嚴飭守備卒全名城屹爲江淮以西保障韓慕廬

有詩稱之

縣志

韓峰起字伯伏原名匡允

順治丁酉舉人

家素貧嗜讀書

備嘗艱苦爲諸生時以舌耕供菽水克盡孝養鄉

薦後任山東鄒縣令精勤盡職惠愛在人去後

思鹽人謁孔林者至鄒其邑人猶嘖嘖稱韓侯政績鄒人有至鹽者社中問韓公之治鄒丈知之否人曰某不知其他見村中爲之立碣者曰昔賣兒今買地韓公來恩無旣其詞若此沒後鄒民猶羣

來拜墓著有四書解待梓

同上

邵冲字翁源號崑星處士汝德子少聰穎順治丁酉戊戌聯捷父以其少不令試越三年始成進士授陝西武功令有治聲父喪歸後補河南溫縣尤多惠政溫南鄴汜邑界以黃河河水移徙兩縣民爭灘地久不決冲訪得庫中石碣確據因購竹簷

數十萬丈越山歷河清其界爭遂息人服其神性
孤介案無宿牘溫人建祠祀之陞陝州知州興利
除害甫三月因不合上官罷民皇皇如失慈母解
組後產不及中人處之晏然著有讀易偶記前志

王化明庠生康熙間捐田二段作貧民義冢又施

關廟香火田六畝縣志

劉芳範字魯山康熙十年學使有齒德兼尊望重

一時之獎據前志補

趙爾孫字子予號耳仙工詩古文詞尤精駢體康

熙乙卯科以北人中順天鄉試第二名傳爲美談

甲戌成進士授翰林院檢討著有石琴館文稿

縣志

霍恪字集木號無欲文行冠一邑卒未獲展以明

經老

劉永撰墓誌

趙炯字子藏號鶴齋

康熙戊午

舉人洪錄孫與邑趙爾

孫滄州劉果實任邱龐雪崖齊名時瀛州社有十

二子而鹽居其五炯與從弟內兩皆與焉由進士

任廣西來賓縣知縣創立學校親爲講解文教大

興三年罷歸益肆力詩古文詞著有香魚山房諸

集年八十八卒

前志

孫嵩字若魯內寅拔貢生性醇謹博學砥行尤以

孝聞

劉果實撰墓誌

張潤字德溥庠生康熙初修邑志與劉運祺同采

訪無纖毫私運祺字逢吉

縣志

張世英字軼倫事繼母以孝聞與弟廷英友愛讓產康熙間以明經授贊皇訓導振興文教體恤生徒

韓秉仁字惠思歲貢生每嚴冬捨棉衣粥飯捐地

一區作義冢立義學又割腴田以贍族邑令盧欲

舉秉仁孝廉方正力辭學使吳應棻特旌之

俱同上

趙鑑字明遠候選同知父蕃昌開原訓導鑑年十

五卽筦家務以娛親志侍母沈疾晝夜不交睫月
餘母忽聞異香而愈興學宮修河橋建義倉賑饑
恤貧皆爲倡首族中疏屬多丁糧遺累出厚貲爲
計長久俾免逃亡子廷炎舉人

霑化吳湘
撰墓誌

趙溫字汝玉雍正癸卯春秋聯捷進士授山西岳
陽令任十四年頌聲徧野陞四川邛州知州旋里
時宦囊蕭然族人元福乾隆辛酉鄉薦甫弱冠未
幾卒著有寒山詩草

縣志

李士晉附貢生乾隆初臨桂陳文恭觀察天津邑
令金承行營建香魚書院士晉慨捐楊家莊地六

百畝爲學田永供師生饗飧文恭稱其見義勇爲
特作記

劉更新字符瑞生員父早逝事母以孝聞乾隆二
十二年壽八十七歲卒

趙東秀字曉崖舉人爾訆孫依祖母邵居劬學戊午

舉卒成進士授徒養老有姑適朱貧困體祖母意
迎歸養之弟東魁字星渠副貢亦工詩古文詞

劉爲庚字星輝歲貢生乾隆初與邑諸生趙思趙
銜李秀閭同修邑志思字五疇素工詩著有嶺南
集詩草銜工書能詩後登拔萃科著有遂軒詩稿

秀閭以明經任司訓

賈瑋字程雲監生捐地百畝餘爲義冢復於衝衢建茶棚以濟行人今呼其地爲茶棚云又張衡祝邢克岐均捐義地

盧克勤子生員塢字公言父子同志雍正十二
年連出穀助賑乾隆八年知府特旌其門

李廷輔字端章監生嘗開義學造就寒賤乾隆八
年出粟千餘石助賑並施絮衣鄉人蒙其惠方春
工作腐集助力不索值孫詠鄒庠生有祖風

劉稼書字田有貢生乾隆八年發粟濟貧二十五

年饑又復周給倉庾爲空上官旌其門

王居易字景白乾隆三十七年歲大歉周恤貧人自冬迄春六月餘不懈又出貲贖還所賣子女

張本質字表正乾隆五十七年歲大歉有王姓妻領賑未及餓垂死使人舁歸救蘇資送婦感恩父事之好義多類此

俱同上

劉适字捷南歲貢生於宅東南園中開半園軒教四方學者十八年不倦卒年六十二門生勒碑記

之

知縣梁兆榜撰墓誌

張詮字守默號陶圃母病禱天減算母果獲瘳由

乾隆己亥舉人宰河南鞏縣減驛豆革兵棚士民

泐石頌德著四書印旨陶圃詩鈔

縣志

賈魁元父永祿出遊不返數請於母往迹之以其
幼弗許乾隆四十五年二十矣因力請往徒步
北土往來營薊間抵山海關外出沒萬山中履穿
資盡乞食土人土人高其行恆哀憐之屢瀕死卒
無遇又念母窮餓仰天號哭而歸抵家無人色奉
母終喪悵鬱卒

采訪冊

任大德字純齋原籍交河廩生授縣丞乾隆五十
七年歲歉出粟二百石邀從兄大受等出粟三百

餘石全活甚眾

縣志

劉曾璇字毓源號蔭渠靜年長子幼有神童之目

弱冠登

乾隆壬子

賢書中年出爲棗強定州學官所至

講學胥融會經書注疏精義而折其衷晚授甘肅

秦安知縣時其兩子慶元慶凱已先後膺民社因

引疾歸著有易鑑補遺春秋書法比義及蓮窗書

室文詩集行世卒年七十五

姜興武字仁龍監生乾隆五十七年歲歉捐穀一

百五十石官旌其門

升元龍字見田號小樓興邑孫大令述庭劉大令

曾璇號爲三才嘗曰吾輩當領風氣不可隨風氣

也由

乾隆乙卯

鄉魁成進士歷宰隴閩士民懷之著有

蛾術文鈔左傳小引

趙越字退思監生父失明夜苦不寐殷望雞聲越
竊學雞鳴而羣應乃秉燭笑語達旦父又患腹腫
證醫云螺螄可治惜冬不能得越急赴河濱碎堅
冰取盈升歸終不自父生子豹文虎文皆明經孫
培之進士

李鈞字平治附貢生與兄鑄友愛皆樂善好施凡
一邑義舉悉爲首倡嘉慶初邑移建文廟度支委

重於鈞三年竣工輿論翕服倡捐數百金建橋於

宣惠河上名曰公義不自專美也

俱同上

孫述庭字渭明號適山嘉慶辛酉膺拔萃旋登甲

子賢書屢蹕春闈己卯始成進士令山左之卽墨

關心民瘼去之日邑人號泣挽留以親老解組歸

不復出長孫鳴珂官編修

陳官俊撰墓誌

孫敏浦字悟軒卅歲舉京兆

嘉慶甲子舉人

及成進士兩

薦皆出編修楊介坪門部銓安徽婺源知縣興紫

陽書院之廢邑人至今不忘

縣志

韓以仁字行之嘉慶庚午領鄉薦時已年近六旬

益好攷辨地輿庚子歲杖策仍入春闈例得國子
監學正卒年九十有三著有四書述義鹽山疆域
志

劉慶元字景辛曾璠長子以

嘉慶戊寅

副榜充教習任

四川納溪知縣署資陽節省夫馬局費調儀隴後
署宜賓裁革公需印紅費八九千緡猺匪竄擾及
境寅夜趕登閣王嶺指揮兵勇鎗斃其前鋒匪驚
竄回巢寅匪滋事先後獲奸細境賴以安回儀隴
任振興文教以川南防勦功升同知直隸州卒年
六十有六著有春壇詩草

張酌字雅園中式

嘉慶己卯

經魁聞報淚下以父不及

見也丙戌大挑以知縣用籤掣秦告近改晉到省
數月卽告養歸母歿哀毀幾滅性遂不復出優遊
林下二十餘年

陳六鄉民陳志仁子與父賣角黍爲生嘉慶某年
夏月同父挽鹿車赴市回至吳家閣東北風雨暴
至天驟寒父凍仆六急脫己衣衣父並以身覆父
身竟同凍死村人視之已不及救

王慶元字穀菴先世自灤州遷鹽山九傳至其祖
鞠思貢生候選知府事節母以孝聞父鶴舉兩淮

鹽大使慶元中道光辛巳舉人丙戌會試以第一人授吏部主事游陞員外郎中掌文選司印釐奸剔弊吏不敢欺豕宰朱文定深倚任之令隨查辦豫粵江浙諸省積案及海塘河庫庚子擢浙江道監察御史辛丑夏赴大通橋稽查漕糧嚴察蠹吏花戶知積弊已深事甚掣肘抑鬱憤懣擬切實上告忽於中夜暴卒差次

上甚疑特遣親信大臣案驗終不獲實事遂寢中外惜之著有聽槐館藤署清吟皇華遠唱詩集次子維攸早入泮亦能詩

劉曾璈字諧雲曾璈第三弟文名偕噪入庠食餼鄉舉皆接踵於兄司鐸高邑高陽截取知縣不就致仕後手不釋卷卒年七十有八著有歷代說約吾南草堂詩文集弟曾珂字鳴宸號霖船行第九道光乙酉拔貢任秦州直隸州判三月著績善鐵筆著有霖船印譜二冊

賈待庠生道光十二年歲歉十三年春糧奇貴待家僅中貲倡義舉捐穀若干石賑飢同時監生賈登第賈超昇張世祿閻森孫鶴年潘立業姜文達于尙志皆捐賑太守陳各旌其門

劉之岳字鎮對永昌裔孫孝友任恤五世同堂

趙培之字因浦由拔萃道光壬辰舉人成進士以知縣籤

分陝西攝華州篆民感其德奉木主郊祭署富平

淳化等縣皆有政聲實授永壽年五十四歲卒於

官俱同上

王九良性癡父早故事母維謹母適市貿布縷值

大雨必負母涉潦以歸家極貧爲人傭必擇近處

朝夕餘閒歸家承歡佃鄰人田數畝以供母食遇

年饑母餐未嘗缺良與妻或數日不食妻不堪出

之迨母歿哀痛欲死葬後弗佃人田行乞餬口每

日持所乞至墓所奠焉

請旌冊

劉清潭字靜亭少年拾遺金於路追還其人失金者願分金相貺笑卻之承胞伯嗣遺田僅二十餘畝有姪不治生家垂盡以己田分與之姪感泣改行以

道光癸卯

舉人司訓魏縣鄉學遷良鄉訓導卒於任

楊溶源字星海咸豐癸丑以舉人大挑二等不就職晨夕奉親後母卒哀毀成疾而歿著有孤松軒文稿

張經母病癰瘕症不起牀簀者六年躬親侍奉洗

滌嘗囊沙於二十里外以備親用捕魚於三十里外以供母嗜始終不怠武生劉鍾琦歲貢趙俊民庠生李照林孫嘉猷孝養皆略同此

張雲廬字季修遷安訓導宗禹子與兄雲蒸皆以孝行稱雲廬性尤摯母病危割臂醵天祈以身代痛死復蘇有高玉峰亦割股療母

韓逢瑞字介錫監生事繼母劉以孝聞弟逢珵劉出也友愛甚至兄弟析居瑞南珵北劉卒時瑞膺疾而居喪勿失禮後病劇珵勸歸南宅以養不聽竟哀毀卒於喪次人稱其如王祥兄弟

王敬業字聖躋附貢生事節母以孝聞捐羊爾莊

田百畝入香魚書院以助膏火

俱同上

楊廷選字升聞前母兄好博母令析產執不可後

入學食餼產盡舌耕以養母兄

縣志

楊玉麟庠生舉優行以孝聞

韓以德字長民家貧親老不能食粗糲飯必躬奉
得歡心而後止親病晝夜不解衣帶旣沒哀毀盡
禮遇烈風雷雨恆奔赴墓

劉恪侯字謹度號耐圃早孤依母趙氏成立母晚
得癰瘕證晝夜侍湯藥屏絕一切數年母卒泣血

哀毀幾至滅性既葬廬墓側服闋親友迎之歸里
士大夫贈詩成帙監生任天相沈修敬庠生劉修
典又捐義冢民人傅光美俱善養親後復廬墓
王澤溥甫生而父遠出十餘歲泣請於母往尋父
跋涉瀋陽諸地備歷艱辛至乞食餬口歲餘卒尋
父歸里孝養終身

張仲裔字孝先舌耕奉親母歿請葬地於館主人
地距館二里許五更及夕必往省視風雨不阻卒
後妻劉氏撫孤成立家亦漸康人謂孝感

劉啞子早孤傭工奉母極得歡心母八十二歲歿

主人義之助葬資嚴冬每夜潛出偵之見其至母墓蹲踞多時始反

李香蓉母患癰瘕四年不離側母歿慟卒

俱同上

李應瑜母冬患痢醫不效乃跣足被髮單衣夜冒雪出家人覺覓之見跪伏關帝廟噤不能言昇歸家逾時始蘇翌日母疾頓愈次年卒應瑜水漿不入口父端怒呵之曰爾獨不爲吾計乎乃勉節哀三十年未嘗一入妻室迨父病腸燥手吸溫水潤之汚面無怠又患目疾時以舌舐之經年目明以

積勞先父卒

請旌冊

姜名山幼出繼武生李璜爲孫璜歿妻盲家貧無
依名山傭工晨出置飲食及溺器在左右以手授
之午歸作飯暮如之十餘年不惰璜妻歿哭泣殯
葬畢復歸姜宗春秋必祭墓

王音槐庠生父故哀泣廢寢食母責之始稍節哀
後母病垂危每夜更深向天哀禱願減己二十年
算以益母壽果瘳逾二十年始卒又以哀毀成疾
歿姊適石氏孀且獨體父母意迎養終身有從兄
貧苦割腴田以贍子闡元舉人

潘道南庠生三歲失父依母張成立母卒哀毀骨

立後墓爲兩壙成心疾每夜攜舂鍤親負土雞鳴
歸經兩月餘家人始知之已成巨封事兄盡禮撫
姪尤篤從遊者多成立以子江成進士部郎封中
憲大夫著有詩義輯要周禮彙編禹貢注疏俱同上
遲伯壩字子和咸豐二年佐同鄉安徽知縣張文
斌募文斌著廬州合肥令時粵寇至伯壩奉派帶
勇勦賊屢著戰功後寇大撲廬州伯壩防守水西
門眾寡不敵與文斌同殉事聞照千總例議卹予
雲騎尉世職案祀忠義已見殉難因合在此故據縣志補
張清輝庠生五世祖文舉有兄二人不欲分爨伯

仲旋乘其出分之比歸哭勸無及兩兄各別居文舉獨奉父母立家約永以長一人主家計合宅聽命設塾教子弟聰穎者餘力農女工助之至清輝同居七十餘口無閒言偶值乏時家主呼合宅至宗祏前泣曰吾不善治生至同受飢餓其各自謀衣食皆環泣誓不分徙光緒四年邑御史李桂林奏請

賜旌

冊請旌

張文沛字霖菴家素封好施排解每出已資息爭所居數十里無赴縣質成者兄又良爲崇慶牧還

恐弟少不更事訪之閭里稱道不置癸未水災大出粟平糶有張廷士者亦以任卹著聞

劉登高字臨川父世傑皆庠生父病調治幾廢寢食父愈遂矢志捨藥濟人嘗在南宮逆旅聞鄰家子病篤舉家無措爲投數劑而愈謝多金不受

邵健字天行知州州曾孫事親孝邑移聖廟於其宅取價至廉爲請議敘力辭無子納妾察知係自鬻以養姑者待其夫遠歸資遣之未幾生子緒武人稱德報孫丕鑑廩生

俱同上

褚爽字澄嵐號衡菴士奇次子年十三入泮歷試

不第而文名特振善畫工詩有南村草行世人號

西山先生

前志

傅葛天監生著有芝香錄十卷詩集四卷

縣志

張康甯字福之廩貢訓導定州正定諸學善書工詩著有慎爾齋詩稿

王華峰字蓮岑庠生工詩礪廉隅著有雲池詩草

張印潭字曉峯庠生著有曉峯詩草與邑李裕需

竇桂芬有三峯之目裕需字霽峯監生有卧吟詩

草桂芬廩生字月峯有澹齋詩草

俱同上

慶雲縣

案此新志潘崔合纂崔因前有不能如志處退而重修且屬其子逮後觀察滇南乃託戴侍御釐定並自刻成較前潘本更覺簡當兩本俱經送局是宜分稱潘本崔本奈初稿於著述末載各志竟沒卻崔氏父子重修別刻遺漏非細因著述先刻爰識於此

李尙賢順治間土寇圍城尙賢突圍出赴鹽山求援道遇賊被執紿曰我能開門納眾賊信之隨至城下尙賢大聲語城上人曰奉使無狀爲賊所執今死矣賊單弱諸君幸堅守無慮也賊怒殺之前志張三成順治五年縣城遭寇圍三成以大義責之賊怒攻益急被執談笑受刃顏色不變同上

胡璜字宸琮教諭時行子性孝友謙恭誠篤提學

御史以德行獎之任襄陵縣丞署絳州事及解組
貧不能歸士民咸資送之至家環堵蕭然不以介
意學者稱之據前志補案祀鄉賢又縣志潘本
列於鄉獻崔本并入孝行均冠鼎革
後與祀位合可見宦遊必非明季然實係明
歲貢也各屬鮮有以禪將庸敏祀鄉賢者

崔養重字莊伯號鹿門由歲貢知密縣中州自明
季大亂十餘年不設官抵任城署殘毀邑父老請
以砦爲縣治因念城郭不可棄乃草創居之招集
流亡與民更始三年大治民爲建生祠德政碑見
孟津王鐸記遷鞏昌府莊浪同知時值回民變飭
邊備轉糧餉兩月賊平又悉心經理善後更閱歲

告歸民繪圖以送見涇陽李念慈詩臨朐馮士標
贈別敘家居二十餘年依然寒士卒年七十三

前志

案祀

鄉賢

胡珪字元朋順治

辛卯舉人

十二年武進士官曹州營

守備署參將事善捕緝撫士卒嚴而有恩越十年

遷大城掌印守備軍民攀轅泣送者數百人大城

地瘠多私鹽捕則爲盜珪築臺設伏制其要害聞

境獲安性嗜翰墨工八分書周亮功稱爲儒將歸

老卒

縣志

陳喜號瀛海順治初以武生隸營伍累遷遊擊豫

王出征潼關以爲前鋒總鎮孔希貴奏隸本營巨盜四起喜悉平之分守歸德賊有李化鯨者僭號河北窺河南甚急喜以我兵雖寡賊素憚不敢徑攻必潛師上流襲我後乃以大眾扼其前設伏因半渡水陸夾擊之賊遂潰撫軍吳景道敘其功爲全豫所賴轉涿州參將數擒劫寇道路獲安經畧洪承疇出師江南題請隨征時賊衆數萬攻常德諸將各有汎地喜獨以僻地爲憂嚴陣以待賊果抄道來攻知有備乃遁洪獎其知兵敘功以副總兵協鎮金華積勞卒於官年四十五子士雅字彥

伯拔貢力學工詩善草書

前志雅誤雄

案

崔允貞字介石歲貢學淹博康熙初重修縣志實
出其手

劉元宰字襄哉年十三遇亂有人自城上擲之下
竟無恙爲父卜葬行泣道路思日思慕涕泣耄年
不異子孫五世同堂卒年九十九子奇字子易就
武科有儒雅風母病禱神請代年九十二卒子夢
楫自有傳

崔槌字商玉庠生家素封好施於鬲津南岸施腴
田五畝爲義冢康熙十二年山左饑民流離道路

出粟二百石濟之施棺施衣諸多義舉俱同上

劉夢楫字爲舟以康熙戊子鄉舉知華亭縣擢知宿州

署直隸潁州事居官廉平多善政監修海塘罷官

後蕭然如未仕子泰字宗嶽處貧孝養其母以鄉

舉授國子監學正銜泰子廣恕成進士自有傳縣志

案夢楫

祀鄉賢

胡清字淡菴康熙辛卯舉人雍正癸卯進士知涇縣改元

城教諭弟淳從學成進士自有傳同上

丁重新家貧力耕養親母卒負土築墳泣血三年

不茹葷飲酒據前志引河同府志補

陳森字如干庠生父患瘡甚危森訪名醫奉湯藥四十餘晝夜未嘗安枕父歿哀毀骨立居喪悉如禮母沒亦三年內屏子孫僮僕獨居柩側前志賈生才幼失怙奉養孀母及母老病篤焚香額天願減己算母病果愈縣令表其門

馮經世字杼平事母備色養母病焚香默祝願減己壽以益母縣令旌之

陳柑字提顯父嚴卒得歡心父沒分產讓弟擇取絕不較績學工書年八十餘以歲貢終

劉敏字子遜十歲工草書溫郡王欲薦於朝力辭

學成授徒後登科者盡出其門縣大水赴省告饑

卒邀蠲賑以歲貢終孫煦進士自有傳

俱同上

陳廷桂字雲芳由

雍正丙午

武舉任千總陞督標守備

署臺灣參將官至右江南陽總兵皆以威信著聞

縣志

胡清字厚菴一字葛民清弟

雍正壬子舉人

晚成進士及

門多登高第謁選得蒙自縣令未之任卒著有易

觀

張鶴字鳴臯以孝聞事繼母無異所生由

雍正己卯副

貢爲新安教諭勤於課士後家居年九十六卒

鄧麟字公遴庠生著有古香齋集

俱同上

胡時雍字際唐歲貢偶拾白金五十兩於縣署前

意必催租吏待而還之善行類如此

前志

馬煌字子光母病侍湯藥三年不怠母亡侍父服

閔不離父繼室始復寢縣令表其門

縣志

劉鈞字顯吾鄰有貧鬻墓地者予值而還券其餘

周濟多端以孫允桂貴贈武顯將軍

王發祥字其長由

乾隆甲子

舉人爲萬全教諭遷保安

州學正歸里後授徒多所成就

劉允桂字丹麓乾隆癸酉舉人庚辰武進士由宿

衛擢遊擊累遷至興漢鎮總兵歷任宣化福甯朔
州諸鎮清慎有威望尤喜翰墨

劉煦字曦若乾隆

庚寅舉人

辛卯進士由順天教授遷

昌邑知縣葺書院築廢隄士民蒙惠解組授徒從
遊甚眾卒年七十五

劉廣恕字可亭乾隆癸卯舉鄉丁未進士第二人
官工部主事陞員外充京倉監督解組後掌教古
棣書院年七十八卒子進曾舉人

劉揮乾隆

戊申舉人

癸丑武進士任甘州守備時教匪

流入陝甘經畧出師揮自請隸大軍捕賊屢有斬

獲護理遊擊嘉慶三年春戰於鞏昌什川鎮盤龍

山陣亡

詔賜祭葬廕子繼忠雲騎尉世職祀昭忠祠

俱同上案其孫世祿襲

職官北堡千總後亦陣亡同祀忠義傳在宣績未因已詳備故不若殷周之更立於此也

劉管城字穎思先自滄州徙慶雲管城後還家於

滄由慶雲武庠生於乾隆五十三四年聯捷進士

充侍衛授襄陽守備嘉慶元年隨湖北巡撫惠齡

剿宜都教匪張正謨聶傑人時張據灌灣腦聶據

鳳凰觀巡撫簡奮勇隊二百人命將之撲鳳凰觀

中途遇賊大呼斫入陣斬賊渠大軍繼進賊退保

鳳凰觀請於巡撫乘不備前後劫其寨必可破從之遂激勵本隊夜從山後猱升五更登巔入寨立擒聶傑人及其二子輩大軍方自山前登管城大呼聶賊已獲衆驚竄遂火其寨論功升都司隨鎮箠總兵剿張正謨於蔡家坡先登斬賊渠卽連破十三卡斬賊八百餘級卽請補雲南鶴麗營都司八月撲灌灣腦復將乘虛劫寨中途知有備遂踰山赴戰所比至戰方鏖卽大呼馳入陣斬張正謨及僞元帥劉宏鐸是時賊首齊王氏劉起榮已過襄江巡撫晉總統任剿捕命管城爲前部二年正

月追及齊王氏於林家笆射中其蓋又追及劉超
榮於隨州大洪山起榮故驍賊圍之數重莫敢近
徑潰圍出管城挺刃與鬪無何各失刃徒手相糾
結頃之起榮仆出數步外遂就擒二月解起榮入
都三月還軍前總統追齊王氏等向秦蜀特調授
甯邊都司六月由陝隨入川追及齊王氏於紅土
牆管城斬其大旗手陣亂王氏欲遁縱馬追及刀
中其騎王氏顛黑女子躍馬來救刃及管城頂急
格傷其手刀落猶徒手相搏王氏得易馬逸黑女
子者襄陽鐵匠女年十九最驍勇善戰既就擒賊

大奪氣齊王氏自是不振而蜀白賊羅其清

賊股分黃

白青藍王氏爲渠魁稱黃

苟文明冉文儔等復大熾三年隨總

統剿賊於方山坪等處多所斬獲以前後功升甘肅河州鎮遊擊時四年三月也齊王氏滅餘黨徧擾秦豫楚蜀間管城方追賊承經畧額勒登保召至營獎勵備至仍命爲前部總兵楊遇春等有斬擒大軍追及冷添祿於悅來場賊聚驍騎決死戰管城與楊遇春合隊添祿已中數箭猶奮擊管城馬蹶添祿挺矛前刺管城袖箭突發連射殪之五月大軍被圍於開縣之四方山兵且殲管城曰馬

革裹尸今日事也因免胄舞刀擇賊最厚處力衝之賊辟易竟馳出促楊遇春赴援復躍馬殺入登山先報經畧率親軍下擊時楊遇春已擒斬千餘遂夾擊之賊大潰經畧曰今日見劉君死綏之志矣川賊衰而甘賊餒又張五年正月隨經畧追擊賊復入陝三月敘前後功升參將四月補陝西波羅營五月隨經畧勦陝斬藍賊於大中峽斬黃賊於石板溝八月隨經畧入甘誘殺白賊於麻池溝復入陝追至竹谿賊欲入楚馳截之十一月自土門至茶鎮八月十三之戰以矛刺冉學勝深入不

得出學勝一躍矛折急斫之中脇復躍出人頭上
遁賊號冉樊萬人敵自是大創未幾冉被擒於高
家營樊投竹山平河死捷聞升副將旋補授甘肅
洮岷協經畧命自領兵與提鎮等時白賊苟文明
與藍號李彬合入楚據竹山經畧令追之嗣改檄
向川因病暫留於王河壩隸以病卒三百病甫愈
陡遇賊萬餘於五塊石山以三百卒大破之殪其
僞先鋒趙四三月由川追賊至陝四月與楊遇春
伏擊於獅子溝六月經畧檄令隨參贊追太平賊
至釣魚臺擊走苟文明十月隨參贊追賊入楚七

月經畧大敗苟文明於甯陝知賊將竄楚檄管城
與提督穆克登布等截堵之十月駐兵於陝楚交
界之王家莊與青賊對壘乘夜雨劫我寨管城已
卧忽飛刀中額急轉幕後分隊爲兩翼自寨後出
分繞寨前眾賊擁寨外管城縱兵蹙之賊擁入寨
寨中賊以爲兵自相殺我兵衝入賊大亂他營聞
變至共圍之賊渠僅以身免十一月經畧斬苟文
明於花石巖大局已定惠齡授陝督調管城中軍
副將赴陝任事甘省軍政久弛竭力整頓未逾年
兵精爲通省最甯夏遷卒有鹽菜銀本鎮已領未

給兵譁及城城關本鎮請以督標兵掩之管城不可馳往諭之曰會城百物具備制軍恐爾妄費至家無以養令本鎮到始給此制軍美意乃喧呶耶速歸營我見汝本鎮爲先容無不諧者否則我在此教戰士猛如虎汝曹得活耶衆懽謝歸營事遂定十四年署甯夏總兵前任虧帑四千金代任之更爲其家屬謀歸資焉俄調永固協十九年署河州鎮總兵二十年正月授陝安鎮總兵任九年戎政大起嘗曰吾兵雖萬里征調辦裝半日卽行蓋無時不爲戰備也後緣事降都司引疾歸卒管城

身經百戰未嘗挫衄固智勇足備亦有天也六年
在川惠齡命迎催額勒登保曉行大霧中聞戈甲
聲方知賊至股已中一矛急避林中賊大至出林
乃臨江懸崖更無路將馬臨崖橫身據鞍力推之
訇然同墮馬仍立江闊數里乃拍馬浮渡竟過賊
隔岸驚駭指畫而已其遇賊於五塊石山也獨坐
岡前關廟石鑪伏三百卒於後自呼賊速上決死
戰俄一賊搖旗上時壺中存三矢一發殪之再上
亦然有頃僞先鋒趙四又登乃瞋目大喝力射墮
之後卒喊聲起賊遽驚竄遂大破之後詢俘何卽

竄曰見一人坐岡已大疑兩斃大旗手益駭趙獨
敢再上忽似霹靂聲中墮死不知其中箭也後過
其地者人猶豔稱劉將軍三箭破賊事云子湮齡
道光六年舉人玉田縣教諭

滄州志稿

崔旭字曉林號念堂父庠生大本孝友多善事旭
嘉慶五年鄉舉出張問陶之門主講古棣書院十
二年成就甚多道光六年大挑授知縣分山西補
蒲縣縣在萬山中城垣倉獄多傾圯書院久廢皆
捐資興修不擾民悍俗漸化分校秋闈多得士告
歸餞送數十里歸十有二年卒年八十著有念堂

文集念堂詩集念堂詩話津門竹枝詞村居雜憶

念堂脞錄諸書燕南二俊詩鈔小傳弟陽晨

縣志

字時林號月沾嘉慶二十四年舉人著有月沾詩

鈔晨字曙林著有柳橋詩草一卷

津門詩鈔

李楨榦原名廷榦字立山嘉慶

甲子舉人

己卯進士官

戶部主事洊升員外郎中勤於其職引疾歸年七

十六卒

縣志

劉坦原名望字次臣年二十四

嘉慶戊寅

舉於鄉己丑

成進士補山西右玉令壬辰分校晉闈丁憂服闋

授江浦縣調山陽勤於其職加同知銜卒於官

徐圭璋字珏亭道光元年舉人丙午以知縣分河

南署魯山縣旋補閔鄉有政聲未幾卒

俱同上

崔光笏字正甫號慧田旭子道光

壬午舉人九年進士

授鄉甯知縣地界秦豫盜賊溷迹威信治之奸僧

清照負嶠山寺恃勇剽掠諸前令莫敢撓乃特簡

勁卒百人入巢穴禽治之遷臨汾代州陽曲所興

除彰輝一如鄉甯在臨汾毀淫祠數十方曹順稱

亂大軍協剿餽餉屬於道殫精瘁盡民不知兵去

之日羣尸祝焉在陽曲疏水道焚狐窟尤人所不

敢爲報最擢知松江府時兵燹後安集流亡上善

後要畧八事期年民氣以蘇丁憂服闋出守九江
升雲南督糧道攝臬事滇黔故多回民咸豐初粵
寇蔓延東川回民馬貳花亦響應制軍出師進剿
知習兵事與偕行軍次尋甸備陳方略戮其酋馬
鵬程等而制軍屬以荆湘之警移節兩湖光笏獨
留卒斬馬貳花撫脅從數千人以勞卒官年五十
四李元華撰傳弟光箕字雅甫道光十五年舉人能詩
官終教諭縣志
解鳳岡字桐軒年二十四道光舉於鄉工詩好遊
乙酉
官遼陽州學正年未五十卒於官

馬裕霖原名玉麟字石齋從父客武清遂占籍入
庠攻苦讀書道光乙酉舉於鄉明年成進士授四
川縣令父猶及就養後丁憂服闋補慶符縣治尙
嚴厲頗著能聲未幾卒官年未四十

俱同上

蔣臨照字普齋咸豐初以武生入伍二年拔外委
三年出師揚州從剿粵匪累遷至遊擊九年擊六
合賊敗之陞德州營參將攻克僧道橋菱塘賊壘
滅薜成良叛匪加副將銜十一年江皖諸匪連營
撲揚城率所部敗走之授義甯協副將同治元年
南匪渡江撲揚城每戰輒捷加提督銜四年克復

丹陽補授天津鎮總兵擒匪入陝調補山西太原
鎮總兵六年十月告病回里七年病痊

命辦理直東軍務疾發卒於天津年四十五長子拱宸
字樞垣以廕授四川忠州直隸州加知府銜署江
北廳丁憂服闋改山西保舉補缺後以知府用署
保德直隸州者再署平定直隸州者一皆以廉明
著光緒十年補保德親查荒地所得不爲升科將
丁糧均於其中又減魚貢之浮民爲立德政碑於
州東門外記其實十七年卒官吏民祀於福德祠

歲時致祭

朱訪冊

王夢瑞母早逝事父孝冬寢先溫父衾夏則不驅蚊不離膝下飲食必躬奉遭喪慟絕復蘇孺慕終身年至九十卒子孫皆列庠序

胡德羣力耕養母母偶蹶大傷手足德羣額天請代恆持匕箸飯之母後果愈人以爲孝感

俱同上

張岐字鎮北幼失怙兄鎮南賈於外獨在家奉祖母與母養嫂姪二十餘年同治七年四月捻匪至負祖母率合家走遇賊於野跪泣哀求賊憐之合家幸免兄嘗病篤侍奉湯藥衣不解帶三月餘

旌請

冊

卷四十五終